



欽定四庫全書總目卷一百七十七

集部三十

別集類存目四

少鶴詩集八卷

兩江總督  
採進本

明武昌王顯槐撰顯槐楚端王榮渼第三子愍王顯裕之弟嘉靖十七年封榮渼嘗自稱黃鶴道人故顯槐自號曰少鶴嘉靖乙巳顯裕爲其世子英耀所弑世宗命顯槐攝國事蹟附見明史楚王植傳此集乃其解政後所自編也千頃堂書目載顯槐尙有文集及續集八卷今未之見惟此集存

雁湖釣叟自在吟九卷附錄一卷

浙江孫仰  
曾家藏本

明王周撰周字質齋嘉興人屢試不售自號雁湖釣叟是集以年月先後編次其詩皆率意直書不拘格律故名曰自在吟末附錄同時題贈一卷并前序後跋皆稱其子爲觀察而不著其名據王錫命張大忠等題詞咸自稱年姪證以太學題名碑所載知其子乃嘉靖乙未進士王倭後官至都御史是編前四卷所稱北上寓京諸詩即奉官京師迎養時作也

十岳山人詩集四卷

浙江孫仰  
曾家藏本

明王寅撰寅字仲房一字亮卿歙縣人嘗北走大梁間詩於李夢陽中年習禪事古峯和尚古峯曰吾徧遊海內五岳今將徧歷海外五岳而後出世寅聞其語而悅之因自號十岳山人是集寅所自編其詩言節宏亮皆步趨北地之派而鑄語未堅時多累句

邊仲子詩一卷

山東巡撫  
採進本

明邊習撰習字仲學濟南人戶部尙書貢之次子王士禎論詩絕句所謂不及尙書有邊習猶傳林雨忽霑衣者是也貢雖仕宦通顯而圖籍以外無餘資習竟貧困以沒僅存其七十歲客孫氏時詩一卷本名睡足軒集士禎

與徐夜共選定之附刻其父詩集後改題今名習詩遠不及其父尤多應俗之作其輓李東陽二詩論雖公而評太許亦乖詩品夜等特以名父之子重之耳

世經堂集二十六卷

安徽道黃採進本

明徐階撰階所編武穆集已著錄是集文二十四卷賦頌詩詞二卷其中數陳治體之文皆能不詭於正餘則未見所長

少湖文集七卷

兩江總督採進本

明徐階撰是集乃階外謫延平府推官時三年秩滿北上延平士人哀其前後諸作爲之付梓凡文五卷語錄一卷詩一卷大都應酬之文十居六七皆不足以傳特用誌遺愛云爾

歐陽南野集三十卷

江蘇巡撫採進本

明歐陽德撰德字崇一泰和人嘉靖癸未進士官至禮部尙書卒諡文莊事蹟具明史儒林傳是集爲其門人王宗沐所編凡內集十卷皆講學之文外集六卷皆應制及章奏策牘之文別集十四卷則應俗之詩文也德之學宗法姚江故惟以提唱良知者爲內而餘則外之別之云

南野文選四卷

江西巡撫採進本

明歐陽德撰此本爲隆慶中其門人馮惟訥等所編於全集僅十分取一然德在朝著述如建儲災異諸疏皆能言人所不能言而是編不載則惟訥等所錄皆講學之文故也是可以觀明儒之所尙矣

笠江集十二卷

浙江孫仰曾家藏本

明潘恩撰恩字子仁上海人嘉靖癸未進士官至左都御史諡恭定事蹟附見明史周延傳是集爲諸生哥叔頤所編凡賦詩五卷策表箋序碑記四卷說對贊誌銘祭文及雜述三卷前有陸樹聲序稱恩所著有笠江集笠江近藁皆已梓行旣沒而其子允哲允端合前後刻藁爲恭定全集今此本仍題曰笠江集殆當時編集未成故以

新序冠於舊本歟

章介菴集十一卷

江西巡撫  
探進本

明章袞撰袞字汝明臨川人嘉靖癸未進士官至陝西按察司副使是集首載大學口義中庸口義各一卷皆訓釋章句之語三卷以下皆雜文十卷爲各體詩而以隨筆瑣言終焉瑣言者袞所作語錄也其文疎爽而頗乏體要序王臨川集幾萬言極論新法之善謂元祐若能守而不變孰非繼述之善又論公以瞑眩之藥攻治之於先司馬公又以瞑眩之藥潰亂之於後遂使國論屢搖民心再擾云云毅然翻久定之案可謂桑梓情深矣

芝園定集五十一卷別集十一卷

浙江汪汝  
璵家藏本

明張時徹撰時徹有善行錄已著錄是集凡分二編一曰定集爲賦詩二十卷雜文二十七卷史論四卷一曰別集爲奏議五卷公移六卷詩文皆分體而律詩中又分兩京藩臬歸田三稟明史藝文志載芝園全集八十五卷考浙江通志時徹尙有芝園外集史蓋合而總計之然浙江通志載芝園定集五十六卷別集十一卷外集二十四卷與此卷數亦不合或定集當爲五十一卷別集當爲十一卷外集當爲二十四卷共八十六卷史誤八十六爲八十五通志誤五十一爲五十六歟其詩文不出常格樂府喜用古題而所擬諸篇皆舍其本詞而擬其增減入樂之詞未免逐影而失形史論尤多偏駁

疣贅錄九卷續錄二卷

江蘇巡撫  
採進本

明顧夢圭撰夢圭字武祥號雍里崑山人嘉靖癸未進士官至江西右布政使此集爲夢圭所自編同里歸有光序之末載府志列傳及有光所撰墓誌則其五世孫登重刊時所附入也首二卷爲就正編乃其讀書劄記之語上卷論五經四書下卷皆雜論而說經講學者居多旨以心學爲宗闡王守仁之餘緒考有光序中稱夢圭暇日以所爲文名之曰疣贅錄則疣贅但其文集之名不應冠於此書蘇州府志載其有北海齊梁武平還山諸藁集中亦不標此名意者四藁乃其詩集與就正編皆別行登重刊時始合爲一編而仍襲其文集之名歟文凡五

卷詩凡四卷續錄則文一卷有奇而詩附焉詩文皆平正通達直抒胸臆無鉤章棘句之習惟詩有捭字未堅者  
蓋當有明中葉風氣初更學問移於姚江而文章未移於北地猶沿長沙舊格者也

北泉集

無卷數 副都御史黃登賢家藏本

明藍田饒田字玉甫號北泉卽墨人嘉靖癸未進士官至河南道監察御史事蹟附見明史葉應鑒傳當張璁等  
希旨議大禮田反覆抗論凡七上章受廷杖幾殆復糾劾陳洸不法事直聲動一時今集中惟錄劾禮部尚書席  
書一疏不知何故其他古近體詩及書記雜文亦未分卷考千頃堂書目田有侍御集十卷又東歸倡和一卷則  
此本已非完書且田生平可傳者在諸諫草今章疏闕佚則此本非菁華所在矣

石比部集八卷

江蘇周厚培家藏本

明石英中撰英中字子珍上海人嘉靖癸未進士官刑部主事是集凡詩三卷文四卷英在西曹以受誣被囚其  
七宣紀夢及古樂府等篇皆獄中所作頗磊落有氣嘗自評其文如赤手捕龍蛇蓋才情俊逸而未能斂才就法  
者也

飛鴻亭集二十卷

兩淮鹽政採進本

明吳鵬撰鵬字萬里秀水人嘉靖癸未進士官至吏部尚書飛鴻亭者鵬謝事娛老之所因以名集千頃堂書目  
作十二卷此本實二十卷蓋黃虞稷誤倒其文也鵬常使安南故集中有征南行諸篇其詩文多應酬之作未能  
精汰後有其孫維貞跋稱於奏疏外檢得若干首又云先有狀譜之作今是集俱不載豈尚有闕佚耶

葉海峯文一卷

浙江范懋柱家天一閣藏本

明葉良佩撰良佩有周易義叢已著錄天台志稱良佩所著有海峯堂前集十八卷此冊乃天一閣鈔本所載皆  
雜文僅四十二頁蓋後人所摘錄非其全集也

兩崖集八卷

湖北巡撫採進本

明朱廷立撰廷立有鹽政志已著錄是集凡詩四卷文四卷其門人兵部尚書劉體乾撰其誌稱其學出於姚江而濟之者復出自姚江之流今其文集內推尊王守仁甚至而詩集中東隣女西隣婦二首詳其詞意實有所託諷意卽指所謂擠之者歟講學而至相傾軋不知所講何學也

水西居士集八卷

山東巡撫採進本

明華綸撰綸字德獻號水西無錫人嘉靖癸未進士官至兵部郎中是集詩二卷文六卷其詩多慶賀贈答之什流麗有餘而深厚不足其文亦尙未成就

春谿詩集四卷

浙江朱彝尊家藏本

明狄冲撰冲字仲虛溧陽人嘉靖癸未進士官至南京工部郎中是集分未達筮仕南行移滇居筠近遊金陵七葉其擬李東陽樂府一百二首自謂神似然全襲原題篇模句仿實牀上牀屋下屋也

王鳳林文集四卷詩集三卷

浙江汪汝璥家藏本

明王從善撰從善字永吉號鳳林襄陽人嘉靖癸未進士官吏部考功司主事是編乃其子之瑞所編多牽率應酬之作千頃堂書目不着錄殆偶未見歟

中川遺業三十三卷

浙江巡撫採進本

明王教撰教字庸之祥符人嘉靖癸未進士官至南京兵部右侍郎是集乃其子在阡所編凡賦二卷古今體詩十三卷樂章及詩餘一卷雜文十九卷前有李濂序稱其學窺本原志在康濟居嘗語人曰吾賦性蹇拙詞翰誠非所長是教平日本不以詩文自命故所作卷帙雖富大抵縱筆所之不甚翦裁結構也

水洲文集四卷

兩江總督採進本

明魏良弼撰良弼字師說別號水洲新建人嘉靖癸未進士官至禮科都給事中以致張璉爲所中削籍歸隆慶初卽家晉太常寺少卿致仕天啟初追諡忠簡事蹟具明史本傳是集爲南昌劉曰宣所刪訂豐城熊劬化爲刻於華

欽定四庫全書總目卷一百七十七

草據其原目凡奏議書簡語錄撰述詩賦等五卷附錄碑記行略一卷此本佚其第三卷之語錄與其第四卷之撰述僅存四卷非完帙矣原序稱其學爲陽明高弟建言受杖者三今疏彙具載一二卷中蓋亦剛直之士詞章則非所長也

東遊集一卷

浙江汪啟淑家藏本

明黃金澍金號莘溪莆田人嘉靖癸未進士官山東新城縣知縣是集卽其赴新城時所作自出京至濟南凡所遊歷俱紀以詩率皆淺易又開以應酬雜著若賀施少府榮膺旌獎序之類錯載於詩之前後尤無體例

北海野人藁一卷

兩江總督採進本

明黃禎撰禎字德兆號北海野人安邱人嘉靖癸未進士官至吏部文選司郎中府志稱其免官歸日事吟咏爲文力追古作者與李舜臣齊名海內謂之李黃然明代他書不甚著李黃之名疑輿記夸飾之詞未必確也宋弼山左明詩鈔謂禎有北上及戶部符臺諸集是編僅鈔存騷賦九首五言古詩數十首前後無序跋蓋非全帙矣

漳莖文集八卷

兩江總督採進本

明李新芳撰新芳字元德別號漳莖潞州人嘉靖癸未進士官至監察御史是集爲其門人楊世卿所編前六卷爲雜文後二卷爲詩賦以行狀墓誌附於後其文講學之作多至三卷而他文宗旨亦不離乎是其詩亦瀟灑風雅之派也

端簡文集十二卷

兩江總督採進本

明鄭曉撰曉有禹貢圖說已著錄是編第一卷爲說經第二卷爲詩第三卷至八卷爲雜文第九卷至十二卷爲奏疏於奏疏中又分三類首淮揚次兵部次刑部曉熟諳典故通達國體志在經世於韻語頗不多作其文亦直抒所見不以詞藻求工前有萬歷庚子彭夢祖序稱曉著作甚富沒後懼累昇火存者未及什一其孫敬仲始爲蒐集付梓云

婁子敬文集六卷

浙江巡撫  
振進本

明婁樞撰樞字子敬河內人嘉靖乙酉舉人官廣宗縣知縣集中雜著頗留心經世之學其論資治通鑑專以首篇命晉大夫爲諸侯立論雖亦有所見而以此一條遂欲盡通鑑之義未免主持太過至於韓延壽趙廣漢考甘陳功罪考唐彙雜州考則皆人人意中語耳

海樵先生集二十一卷

安徽巡撫  
採進本

明陳鶴撰鶴字鳴野山陰人案浙江通志鶴嘉靖乙酉舉人年十七襲廕紹興衛百戶非其志也遂棄官稱山人則亦孤僻之士矣是編賦一卷古體詩四卷近體詩九卷文七卷陸慶丁卯其子以世職莅兵粵東屬南海盧夢陽番禺黎民表校正編次明自中葉以後山人墨客多以詩遨遊公卿間然有才有識詭使氣者粗疎體格蕪雜率同一轍宋彝尊詩話稱鶴才鋒雖鈍而鑄詞差醇似比諸家稍勝考盧夢陽序稱其築室飛來山麓閉戶伏枕手不釋卷足不下牀者七年葺卷軸較多故與枵腹沾韻者異也其絕句頗爲清雋不止彝尊所摘律詩數聯然趁筆而出往往利鈍互陳視孫一元太白山人集尙未足旗鼓相當焉

長谷集十五卷

安徽巡撫  
採進本

明徐獻忠撰獻忠有吳興掌故已著錄是集賦一卷詩三卷文十一卷嘉靖甲子松江府知府袁汝是與其鄉士大夫陳金刻之編次者其門人董宜陽也朱彝尊詩話稱其詩冲澹無累句所少者警拔足爲定評至其論松江加耗守備錢法水利諸書條析利弊皆頗詳悉在一鄉亦足資考核焉

胥臺集二十卷

浙江巡撫  
採進本

明袁表撰表有世緯已著錄是編詩不失體格而特乏堅蒼文亦俊爽而醞釀未免少薄初爲其嗣子尊尼所刊詩文各十卷題曰袁永之集此本爲萬歷甲申衡藩所重刊改題曰胥臺集實則一書故千頃堂書目載袁永之集二十卷註作胥臺集也前有左長史鄭復序序言衡府司理張炳忠爲表之甥以是集贊於衡王因爲開雕云

趙浚谷集十六卷

浙江汪汝環家藏本

明趙時春撰時春有平涼府志已著錄時春素以將略自命不屑屑以詩文名然明史本傳稱其讀書善誦記文章豪肆與唐順之王慎中齊名今觀其詩文多慷慨自喜不可拘以格律胡松序所謂秦人而爲秦聲亦其風氣然也然則史所謂文章豪肆者長短俱在是矣是集詩六卷文十卷皆編年而不分體徐階序稱十六卷與此集合李開先序則謂詩六卷文九卷凡十五卷續有作者當續入之蓋開先序在嘉靖乙丑而階序在萬歷庚辰時春沒後十五年又有所續入也

別本浚谷集十七卷

安徽巡撫採進本

明趙時春撰此本凡詩二卷賦及雜文十五卷有其甥周鑒序明史藝文志載時春集作十七卷卽據此本也

雲崗選集二十卷

浙江孫仰曾家藏本

明龔用卿撰用卿字鳴治懷安人嘉靖丙戌進士第一官至南京國子監祭酒是編首賦次詞次詩次雜文考古人以詞爲詩餘今編入詩前殊乖體例所作亦大抵館閣體也

東匯詩集十卷

兩江總督採進本

明呂希周撰希周字師旦崇德人嘉靖丙戌進士官至通政使是集編於嘉靖甲寅其子端甫志云始自乙酉迄今甲寅其詩一千二百八十九首呈於太保東湖公欣然命付之梓東湖陸炳別號也爲希周門人朱彝尊詩話云東匯於詩亦沾沾自喜其集不甚傳由其子詩論定於陸武惠也同里曹秋嶽侍郎集明三百年名公手蹟裝潢成冊多至七百家東匯雜詩在焉比集中所載者較勝今詳端甫志希周家居至甲寅尙無恙曹溶所集當是其甲寅以後詩歟

陸賓齋集十卷外集二卷

臆部尚書曹秀先家藏本

明陸邦撰邦有質齋雜著已著錄是集爲郁天民所編外集二卷則附錄諸敕誥狀及贈送誄贊之文與士民頌

德之作也徐階誌其墓稱邦讀書取爲章句嘗曰人心與事物不相離舍事物而徒求諸心者禪學也逐事物而不求諸心者俗學也故集中有傳習錄存疑不附和陸學又有詩傳存疑亦不盡墨守朱學持論可謂篤實詩文則多近質朴蓋非所畱意云

田叔禾集十二卷

江正次  
陳家藏本

明田汝成撰汝成有炎微紀聞已著錄其全彙本名豫陽集亦名楊園集此集乃汝成晚年令其子藝衡所編凡詩文三百六十九首五十以後所作均不在是焉汝成歸田後盤桓湖山搜剔名勝殊以風流自賞其詩律隊伍修整頗自娉媚秀出然使逢大敵則未足相當文體亦頗傷平易

玩芳堂摘彙四卷

兩江總督  
採進本

明王慎中撰慎中有遼嚴文集已著錄此本乃嘉靖中江陵曹忬以御史巡按江西取篋中所有慎中之文校而刻之僅一百首故以摘彙爲名

江午坡集四卷

江西巡撫  
採進本

明江以達撰以達字子順號午坡貴溪人嘉靖丙戌進士官至湖南提學副使案千頃堂書目作福建提學誤編以達去湖廣頗遠不至忤楚議也忤楚藩繫獄後放歸病卒明史文苑傳附見王慎中傳中朱彝尊靜志居詩話曰午坡以北地文出廬陵肩山之上又謂昌黎詩不逮文尙染習氣云云今考其語見集中所載張東沙集序然其與霍渭崖論文書云模形者神遺斷句者氣索景會者意脫蕊繁者衰衰譬諸畫地爲餅以餓則難刻木爲人束之衣冠與之酬色笑而施揖讓則不可其於正嘉之時剝竊摹擬之病又未嘗不知之而趨向如是何耶

芻蕘錄二十卷

江蘇周厚  
靖家藏本

明馮恩撰恩字子仁華亭人嘉靖丙戌進士官南京監察御史以疏論張璉汪鉉方獻夫三人下獄擬死其子行可刺血書疏請代死謫戍雷州越六年赦歸隆慶初進大理寺丞致仕事蹟具明史本傳是集凡文十五卷詩五卷恩

爲行人時嘗奉命勞兩廣總督王守仁因從王守仁講學故其詩文得守仁餘緒爲多其最得名者在嘉靖壬辰彗星見應詔陳言一疏其被禍也蓋坐以上言大臣德政律固非其罪然恩爲御史抨擊權姦是其職也至於所不抨擊者置之不論可矣乃一一臚舉所長類乎薦牘是旣欲有所退又欲有所進卿相之簡擢臺諫操之矣此亦憤激一決不暇擇言旣乖政體又授議者以閒也且稱禮部尙書夏言多蓄之學不羈之才駕馭任之庶幾救時宰相禮部右侍郎顧鼎臣警悟疏通不局偏長器足任重核以一人本傳亦皆不確蓋其忠鯁之氣足貫金石而立言則不必盡當是固當分別觀之者耳

少泉集三十三卷

浙江孫仰曾家藏本

明王格與格字汝化京山人嘉靖丙戌進士改庶吉士出爲分巡河北道按察司僉事世宗南巡坐行宮火杖黜隆慶初授太僕寺少卿致仕明史文苑傳附見王廷陳傳末千頃堂書目載格少泉集十卷今考此本凡詩選十卷詩續選八卷詩新選六卷文選五卷續文選四卷共三十三卷黃虞稷蓋僅得其詩選著錄也朱彝尊靜志居詩話稱其信口矢筆合作者寡今考王世貞序云公於意非不能深不欲使其淫於詩之外於象非不能極不欲使其游於見之表才不可盡則引矩以圓之亂不勝靡則爲質以禦之詳其語意殆亦微詞也歟

穀原文草四卷

兩江總督採進本

明蘇祐撰祐有道旃瑣語已著錄是編乃其文集也原分四卷每卷又自分上下詞多駢麗規仿文選而真氣不足以充之在七子派中又爲旁支矣

穀原集十卷

山東巡撫採進本

明蘇祐撰此編乃其詩集大旨宗李攀龍之說不肖作唐以後格而亦不能變唐以前格故音節琅琅都無新意

岳雲石集五卷

直隸總督採進本

明岳倫撰倫字雲石懷安衛人嘉靖丙戌進士官至工部郎中卒贈太常寺少卿是集文三卷詩二卷附以其子魯

訟冤疏案集中最著之文莫若劾張璠桂萼疏疏後附世宗諭旨曰張璠著回家省改桂萼革去散官以尙書致仕然考璠等本傳璠之罷也一由給事中陸粲再由御史譚緒端廷赦唐愈賢三由魏良弼奏璠等之罷也獨由給事中陸粲不見有倫効罷二人之事與史傳絕不相符疑以傳疑可矣

金陵覽勝詩一卷

浙江范懋柱家天一閣藏本

明章恩撰恩字元之山陰人是集刻於嘉靖丙戌皆五七言近體多題咏名勝之作其所列古蹟如桃花小峴及虎踞關皆志乘所未載然才力稍弱尙未足以摹寫江山

別本羅念菴集十三卷

浙江汪汝霖家藏本

明羅洪先撰洪先有冬遊記已著錄是編爲嘉靖癸亥其同年滁陽胡松所刻凡書二卷雜著一卷序記傳狀銘表各一卷祭文及雜文二卷古律詩二卷蓋初刊之本非其全帙也

松溪集十卷

兩淮鹽政孫進本

明程文德撰文德字舜敷永康人嘉靖己丑進士官至吏部左侍郎掌詹事府調南京工部右侍郎疏辭忤旨除名歸萬歷中追贈禮部尙書諡文恭事蹟具明史儒林傳是集第一卷爲對策講章二卷爲頌及古體詩三卷爲今體詩四卷爲奏疏表五卷爲書六卷爲序七卷爲記跋八卷爲祭文九卷爲傳誌銘十卷爲雜著詩非所長奏疏內如賑濟疏所條陳便宜諸事頗切明季時政之弊又所奏郊壇事例皆明史各志及明會典王圻續通考所未載考文德自述謂私淑王子子蓋亦講良知之學者如寄諸生書稱今古聖賢之道不違其心復王畿書謂全真返初以求放心歐陽明文錄謂明德新民無外無內之疑於禪者非是皆不免於回護至其論學云學問之道必先立志志既立則行有定適格致誠正成懼慎獨別其塗轍學問思辨自不容已是尙知以躬行實踐爲歸史稱文德初從章懋游後乃從王守仁故與王畿輩之涉於禪悅者差少異耳

程文恭遺藁三十二卷

浙江巡撫孫進本

欽定四庫全書  
目錄  
卷一百一十七

明程文德撰此集二十二卷以前皆文二十一卷以後皆詩較松溪集爲賅備然體格則一也

周漢中集四卷

內府藏本

明周顯宗撰顯宗字子考濮州人嘉靖己丑進士官至漢中府知府是集前三卷爲自適棄官所著詩詞雜文後一卷爲感寓錄則隨筆割記也詩不入格感寓錄亦多雜禪語以空悟爲宗

南北奉使集二卷

浙江汪啟淑家藏本

明唐順之撰順之有廣右戰功錄已著錄是編一爲北奉使集乃其以職方郎中出覈薊鎮兵籍時所作一爲南奉使集乃視師江浙所作兩集俱載其籌邊勘寇之事先敘論次題疏次啟劄次詩篇前後皆無序跋

陳后岡詩集一卷文集一卷

浙江巡撫採進本

明陳東撰東字約之鄞縣人嘉靖己丑進士官至河南提學副使事蹟具明史文苑傳東與唐順之爲同年其倡爲初唐六朝之作以矯李何之習而所學不逮順之又自翰林改禮部主事追復官編修旋卽外調恆忽忽不樂年僅三十餘而卒文章亦未成就故順之終以古文鳴而東無稱焉詩集爲順之所編皆嘉靖甲午乙未丁酉三年之作其餘僅寥寥數首文集爲張時徹所刊分京楚閩洛四集以居官之地名之初刻於蜀中又刻於吳郡此本乃萬歷中其同邑林可成所校刊也

燕貽錄十三卷

兩江總督採進本

明孫應奎撰應奎字文卿號蒙泉餘姚人嘉靖己丑進士官至右副都御史總理河道後左遷山東布政使明史附見建陽孫應奎傳而以餘姚孫應奎別之蓋與胡松傳中附載績溪胡松均以同姓名合傳也是集前三卷皆憶言其語錄也次書二卷文二卷詩三卷次河南存業二卷林居續業一卷則詩文雜編焉應奎受業於王守仁講良知之學初官禮科給事中疏劾汪鉉頗有直聲然其著作則自成其爲講學家之詩文而已

胡莊肅集六卷

安徽巡撫採進本

明胡松撰松有滁州志已著錄是集惟第二卷末附載詩賦餘俱雜著考明史本傳松初以禮部郎任山西提學副使上邊務十二事帝嘉其忠懇進左參政巡撫江西時會討廣東寇張璉又援閩破倭功績甚偉然其經世之文惟答翟中丞邊事書及厚蓄實塞防邊制蠻四篇頗見謀略餘皆不載集中豈別有奏議集歟其中格物解謂心外無事事外無心蓋從事於姚江之學者其功名亦略相彷彿焉卷首有凌約東游棄序鄒宗源趙大綱南浮棄序徐獻忠西游棄序田汝成徐渭浙垣棄序殆各集別有專本此其彙而刻之者也

別本胡莊蕭集八卷

山東巡撫採進本

明胡松撰是集凡文六卷詩二卷與六卷之本稍有增刪而大致相同

鶴田草堂集十卷

浙江巡撫採進本

明蔡雲程撰雲程字亨之臨海人嘉靖己丑進士官至刑部尚書是集詩三卷文七卷雲程當王李盛行之時獨無羣挺剽竊之習可謂不轉移於風氣然根柢頗薄亦不能自樹一幟

熊南沙文集八卷

浙江汪汝霖家藏本

明熊過撰過有周易象旨決錄已著錄是集乃隆慶戊辰其門人嚴清所刻前四卷爲疏序書記後四卷爲題跋引傳碑銘祭文雜著過畱心經學其文章亦列名八才子中然集中諸作大抵應酬之文也

環溪集六卷

兩江總督採進本

明沈愷撰愷有夜燈管測已著錄是集皆所著雜文乃其門人任子龍所編前有徐階序題曰鳳峯雜集序又有文徵明序亦題曰鳳峯子詩彙序疑今名爲後來所追改而又佚其詩集歟考千頃堂書目別載環溪集二十六卷則此非其全也愷文章頗尙古雅不冒作秦漢以下語而模仿太甚遂與北地同歸

閒居集十二卷

兩江總督採進本

明李開先撰開先有中麓畫品已著錄是集詩四卷文八卷皆歸田後所作其自序謂年四十罷歸田里既無用世

之心又無名後之志作不必工信口直寫名其集曰閒居以別居官時苦心也嘉靖初開先與王慎中唐順之熊過陳東任瀚超時春呂高稱八才子其時慎中順之倡議盡洗李何剽擬之習而開先與時春等復羽翼之然開先雅以功名自負既廢以後猶作塞上曲一百首以寓其志又末卷有蘇息民困或問及顏神事宜潛渠私議漂議諸篇亦尚汲汲於經世不甚爭文苑之名故所作隨筆揮灑一篇或至數千言其詩亦往往疊韻至百首其持論確於李何而終不能奪李何之壇坫蓋有由矣

蔡可泉集十五卷

浙江巡撫探進本

明蔡克廉撰克廉字道卿晉江人嘉靖己丑進士官至戶部尚書其文每篇皆係以時地末綴以各體詩及案牘之文萬歷初其子應龍應麟錄而梓之克廉少與鄉人王慎中齊名而其文乃遠不及慎中蘇潛序稱克廉秉樞執鉞時慎中已陞伏故園日尋歐曾之緒而克廉方銳意事功論者謂慎中閱寂邱園故文獨工云云是當時已有定

評矣

端肅公集十卷

山東巡撫探進本

明葛守禮撰守禮字與立德平人嘉靖己丑進士官至左都御史諡端肅是集凡文九卷詩一卷邢侗爲之序

知白堂藁十四卷

浙江孫仰曾家藏本

明翁溥撰溥字德宏諸暨人嘉靖己丑進士官至南京刑部尚書諡榮靖是集乃其門人金元立潘季馴所編凡詩六卷雜文八卷其中奏疏十五篇乃巡撫江西及爲吏科時所上皆無關大計其餘亦大抵應酬之作

張靜思文集十卷附錄二卷

江蘇巡撫探進本

明張選撰選字舜舉無錫人嘉靖己丑進士授蕭山知縣擢戶科給事中會太廟祫祭世宗遣勳臣代行禮選抗疏力諫廷杖削籍隆慶初復原官終於通政司參議事蹟具明史本傳是集乃其曾孫繼曾所編凡文九卷詩一卷其末二卷則附錄居官政績及碑銘小傳也

浚濱集十卷附錄二卷

直隸總督採進本

明蔡駿撰駿有浚濱語錄已著錄是集爲其門人李登雲等所編凡文六卷詩四卷銘贊之類附於詩末附錄二卷則其朋友贈答與門人稱頌之作也駿早師真定張瑄入仕後師朝邑韓邦奇增城湛若水平居務講學立朝務氣節文章蓋非所長云

崔筆山文集十卷

安徽巡撫採進本

明崔涯撰涯號筆山太平人嘉靖己丑進士官至監察御史是集自一卷至七卷爲奏疏及雜著八卷爲古今體詩九卷爲虎異十卷爲鵲異兩卷之末各附以頌德詩涯在當時有伉直聲而文章非其所長詩尤不入格所謂虎異者涯巡視山西時有虎自入神廟爲人所殲鵲異者涯巡視福建時有葉氏爲奴所殺憑鵲以訴冤涯皆自紀其事而所屬縉紳各歌頌之因彙刊集後昔猛虎渡河劉寬以爲偶然而涯乃以恍惚之事引爲己功人之度量相去蓋不可道里計矣

環碧齋詩集三卷尺牘三卷

浙江孫仲曾家藏本

明祝世祿撰世祿有環碧齋小言已著錄西江志稱其工詩善草書談理獨抒心得今觀其詩格調頗伉爽而簡汰未嚴尺牘更開三袁一派矣所謂談理獨抒心得者殆卽指小言已訂正於雜家類中茲不具論焉

司勳文集八卷

兩淮鹽政採進本

明羅虞臣撰虞臣字熙載廣東順德人嘉靖己丑進士官吏部稽勳司主事事蹟附見明史劉世毅傳虞臣以初任刑部主事提牢時寬假張延齡爲大猾劉東山所訐下獄拷掠斥爲民旣歸結廬山中讀書纂述年僅三十五而卒然其他皆作不傳惟是集存其平生不屑爲詩賦故集中皆散體之文自六卷以下則採錄所作家乘以足之惟以中官傳六七篇參雜其間耳其文疎快有氣然皆率其才氣縱筆一往未能範以法度也洗桂奇序以司馬遷擬之談何容易乎

五嶽山人集三十八卷 江蘇巡撫探進本

明黃省曾撰省曾有西洋朝貢典錄已著錄是集凡賦詩十八卷雜文二十卷王世貞序稱其古今體詩皆出自六代三唐於他文亦推許甚至及其爲藝苑危言則云勉之詩如假山雖爾華整大費人力朱彝尊靜志居詩話亦謂其詩品太庸沙磔盈前無金可採今觀其集兩家之說不虛矣中第二十卷爲客問四十章二十一卷二十二卷爲擬詩外傳二十三卷爲黃氏家語明人亦摘出別行其客問雜論物理多臆揣之說擬詩外傳未免優孟衣冠至家語勸立篇名儼同孔氏抑又僭矣

蓉山集十六卷 江西巡撫探進本

明董燧撰燧字兆時蓉山其號也臨川人嘉靖辛卯舉人官至南京刑部郎中燧少從王良弼豹講良知之學是集自首卷至六卷皆其問荅會語七卷至十卷爲詩十一卷至十六卷爲雜文

孔文谷詩集十四卷 山西巡撫探進本

明孔天允撰天允字汝錫號文谷又號管涔山人汾州人嘉靖壬辰進士第二於故事當授編修以藩戚外補陝西提學僉事官至浙江布政司參政朱彝尊靜志居詩話云管涔山人如新調鸚鵡雖復多言舌音終強蓋深不取之此集爲同安洪朝選所刻內履霜集一卷澤鳴臺一卷漁嬉臺以編年爲次自隆慶丁卯至萬歷戊寅十二年所作分十二卷校以浙江探進之本佚闕尚多非其完帙考千頃堂書目亦載天允詩集十四卷則黃虞稷所見卽此本矣

孔文谷文集十六卷續集四卷詩集二十四卷 浙江巡撫探進本

明孔天允撰此本較其家刻多文集二十卷而詩則惟有履霜集漁嬉臺闕澤鳴臺一卷所作霞海篇亦不在其中相其詩集版式蓋隨作隨刻故傳本多少不定也焦竑國史經籍志載天允集僅三卷是卽多所續增之明驗矣